

समा. 09.20 Hrs



Headlines

उपराज्यपाल मनोज सिन्हा होरें कर्तव्य मार्ग पत्रिका दे चौथे संस्करण दा विमोचन कीता ते आखेया जे स्हाड़ी प्राचीन ज्ञान परम्परा इक सफल ते खुशहाल आधुनिक जीवन दा आधार ऐ।

मुख्यमंत्री उमर अब्दुल्ला होर कल केन्द्री जल शक्ति मंत्री हुंदे नै मिले ते जम्मू-कश्मीर च जलजीवन मिशन दी अमलावरी सरबन्धि केई मुद्दे पर गल्लबात कीती।

जम्मू-कश्मीर अज्ज पैहले-पैहले अंतराष्ट्रीय दंगल ते रुस्तमे जम्मू-कश्मीर खताब दी मेजबानी करने जा'रदा ऐ। एहदा सरिस्ता जम्मू दे एम.ए स्टेडियम च कीता गेदा ऐ।

जम्मू स्मार्ट सिटी लिमिटेड नै दिल्ली च आयोजित पी.एस.यू ट्रांसफॉर्मेशन अवार्ड समारोह दौरान राश्ट्रीय स्तर दे त्रै सम्मान हासल कीते न।

जम्मू प्रांतै दे पदरे इलाके च घनी धुंध कारण आम-जनजीवन प्रभावत- अज्ज शामी'लै हलकी बरखा पौने दी मेद।



LG- Kartavya Marg

उपराज्यपाल मनोज सिन्हा होंरें जम्मू लोक भवन च कैलख ज्योतिष ते वैदिक संस्थान ट्रस्ट दी सलाना पत्रिका “कर्तव्य मार्ग” दे चौथे संस्करण दा विमोचन कीता। इस मौके पर किट्ठै गी सम्बोधित करदे होई उपराज्यपाल होंरें आखेया जे साहड़ी प्राचीन ज्ञान प्रणाली ते अंदरूनी ज्ञान-कामयाब आधुनिक दुनिया लेई इक खाका पेश करदा ऐ। उनें आखेया जे भारत दी प्राचीन ज्ञान प्रणाली समकालीन चुनौतियें दा हल पेश करदी ऐ ते वेद ते उपनिषद जनेह प्राचीन ग्रंथ ज्ञान दा खजाना न। उपराज्यपाल हो’रें वैदिक विज्ञान- लोक संस्कृति ते सांस्कृतिक मुल्लें गी बढावा देने लेई ट्रस्ट दी सराहना कीती ते नौजआनें गी भारत दी विरासत कन्ने जुड़ने लेई प्रोत्साहित कीता।

<><><><><><>

LG- Delegations

कैई जन प्रतिनिधियें- संस्थागत प्रमुखें ते प्रतिनिधिमंडलें उपराज्यपाल मनोज सिन्हा हुंदे कन्नै मलाटी कीती ते बक्ख-बक्ख समाजिक- शैक्षिक ते पेशेवर मुद्दें पर चर्चा कीती। जम्मू संस्कृति स्कूल दे चेयरमैन हरप्रीत सिंह होरें स्कूल दियां प्रिंसिपल रोहिणी आइमा सनैं कोर्डिनेटर पूजा वजीर ते मीना कुमारी हुंदे कन्नै उपराज्यपाल होरेंगी स्कूल दी औंदी प्रदर्शनी बारे जानकारी दिती। तौआई जम्मू-कश्मीर हाई कोर्ट बार एसोसिएशन दे इक शिष्टमंडल नै जम्मू-कश्मीर काश्तकारी कन्नू- 2025- जिला अदालतें दे स्थानांतरण ते वकीलें दी कलोनी दी स्थापना सनैं कैई मामलें पर चर्चा कीती। एहदे इलावा ओ.बी.सी. वेलफेयर एसोसिएशन जम्मू-कश्मीर दे चेयरमैन होरें बी उपराज्यपाल हुंदे कन्नै मलाटी करियें ओ.बी.सी. समुदायें कन्नै जुड़ी दियें कल्याणकारी योजनाएं पर चर्चा कीती।

<><><><><><>

CM-CR Patil

मुख्यमंत्री उमर अब्दुल्ला होरें कल नमीं दिल्ली च केन्द्री जलशक्ति मंत्री सी.आर. पाटिल हुंदे नै मलाटी दौरान जम्मू-कश्मीर च “जल-जीवन” मिशन दी अमलावरी सरबन्धि कैई सारे मुद्दें पर गल्लबात कीती- जिंदे च नमें सिरेया शुरु कीती गेदियें स्कीमें गी तोड़ चाढ़ने- जिंदे चा मती सारियां तोड़ चढ़ने दे कोलकाल न- दे इलावा “जल-जीवन” मिशन सनैं मुकम्मल होई चुके दे होरनैं कम्मैं लेई केन्द्री फंड जारी करने दा मुद्दा बी शामिल रेहा। मुख्यमंत्री होरें उनेंगी जकीन दोआया जे जम्मू-कश्मीर सरकार कम्मैं गी समें-सिर तोड़ चाढ़ना जकीनी बनाग ते जल जीवन मिशन दे लक्षें गी हासल करने लेई कम्मैं पर नेइमी तक्क रखोग। मुख्यमंत्री होरें केन्द्र सरकार आसेया दिती जा रदी सहायता ते समर्थन कन्नै जम्मू-कश्मीर दे ग्रामीण इलाकें च “हर घर जल” दे लक्ष गी तौले हासल करने दे केन्द्र शासत प्रदेश सरकार दे धेइए गी फही पक्का कीता। मुख्यमंत्री हुंदे कन्नै जलशक्ति मंत्री जावेद राणा होर बी गेदे हे।

<><><><><><>

Rustam-e-JK (Dispatch)

जम्मू-कश्मीर दे ऐतिहासिक मौलाना अज़ाद स्टेडियम च अज्ज अपनी किस्में दा पैहला-पैहला कुश्ती दा आयोजन कीता जा'रदा ऐ- जेहदे च पैहला अंतराष्ट्रीय दंगल ते “रुस्तमे- जम्मू-कश्मीर-2025” लेई मुकाबले शामिल न। इस बड़दे आयोजन च 100 कोला मते राष्ट्रीय ते अंतराष्ट्रीय सतह दे पलोआन हिस्सा लै'करदे न- जेहड़े “रुस्तमे- जम्मू-कश्मीर-2025” दा खताब जितने लेई अपना पूरा दमखम लाने लेई तयार न। एह आयोजन पैहले 17 दिसम्बर गी होना हा- पर टाले लेई जाई सकने आहले हालात दे चलदे इसी अज्ज शुरु करोआया जा'रदा ऐ। इस बारे होर मती जानकारी देया' रदे न स्हाड़े संवाददाता

<><><><><><>

किश्तवाड़ जिले दे सिंहपुरा इलाके च संदिग्ध गतिविधि बारे खूफिया जानकारी थोने मगरा भारतीय फौज नै इस इलाके च बड़दे पैमाने पर तुपाई अभियान रम्भेया ऐ। पूरे इलाके दी घेराबंदी करी दिती गई ऐ कुसै बी बड़डी घटना गी रोकने लेई लगातार तपाश जारी ऐ। स्हाड़े जिला संवाददाता थमां होर मती जानकारी

<><><><><><>

Jammu Smart City Award

जम्मू स्मार्ट सिटी लिमिटेड नै नमीं दिल्ली च आयोजित पी.एस.यू ट्रांसफॉर्मेशन अवार्ड -2025 च त्रै राष्ट्रीय सम्मान हासल कीते न। सार्वजनिक क्षेत्रें दे उपक्रमें आसेया समाज च बदलाव ते सुधार आहन्ने सरबन्धि इनें अवार्ड च जम्मू स्मार्ट सिटी लिमिटेड गी तवि रिवर फ्रंट विकास च हासल उपलब्धियें- शैहरी गतिशीलता ते कुदरत दे अनुकूल हरित सार्वजनिक ढांचागत सरबन्धि पैहलकदमियें लेई एह सम्मान दिते गे न। इस मानता कन्नै इस गल्लै दी तस्दीक हुंदी ऐ जे जम्मू-कश्मीर दी टिकाऊ शैहरी विकास- आम लोकें दे हितें पर केन्द्रित योजनाएं- पर्यावरण दे संरक्षण गी ध्यानै च रखदे होई विकास कम्में गी तोढ़ चाढ़ने ते आधुनिक सार्वजनिक ढांचा उपलब्ध कराने गी लेइयै- वचनबद्धता किन्नी मजबूत ऐ। एहदे कन्नो-कन्नी इस उपलब्धि कन्नै जम्मू-कश्मीर च शुमार हून देसै दे बेहतरीन कारकरदगी दस्सने आहले स्मार्ट सिटी शैहरें च होआ'करदा ऐ।

<><><><><><>

राष्ट्रीय टीकाकरण दिसव 2025 तैहत पल्स-पोलियो अभियान जम्मू-कश्मीर च 21 दिसम्बर थमां शुरु होग। इस दौरान 5 बरे तगर दी उमरी दे 19 लक्ख थवां बद्ध बच्चें गी पोलियो दियां बूँदा पलाइयां जागंन। घर-घर जाइयै 22 ते 23 दिसम्बर गी ए बूँदा पलाइयां जागंन तां जे कोई बी बच्चा खुंजी नैई जा। अधिकारियें दस्सेया ऐ जे एहदे लेई 10 जहार 993 बूथ कायम कीते गे न ते 518 गश्ती दल बी लाए गे न। मीडिया राहें बी इस बारे जागरुकता फैलाई गेई ऐ- तां जे जम्मू-कश्मीर गी पोलियो मुक्त रखेया जा। इस बारे होर जानकारी दिंदे होई जम्मू-कश्मीर प्रदेश टीकाकरण अधिकारी Dr. Shahid हुसैन होरें आखेया

<><><><><><>

मुख्य भरै च हफ्ताभर चलने आहले “सुशासन” अभियान दे इक हिस्से दे तौरा पर रामबन दे बटोत इलाके च फल ते सब्जी मंडी च इक-रोजा “प्रशासन गांव की ओर” कार्यक्रम दा सरिस्ता कीता गया। रामबन दे डिप्टी कमीशनर मोहम्मद अलयास खान होरें इस कार्यक्रम दा उदघाटन कीता- जित्थे मुकामी बसनीकें ते मन्ने-परमन्ने दे लोकें अपनियें दिक्कतें-परेशानियें गी सिद्धे डी.सी. हुंदे ते मैहकमें दे प्रमुखें अग्गे रखेया। अधिकारियें पुट्टी गेदी मंगें ते मुद्दें पर समें-सिर कारवाई दा भरोसा दोआया ते नागरिकें गी ध्यान च रखने आहले शासन दे महत्व पर जोर दिता। इस कार्यक्रम दा मकसद लोकें दी हिस्सेदारी बधाना- पारदर्शिता गी यकीनी बनाना ते हेठली सतह पर सरकारी सेवाएं गी असरदार तरीके कन्नै उपलब्ध करोआने लेई बढ़ावा देना ऐ। इस मौके पर बोलदे होई डी.सी. रामबन होरें आखेया

<><><><><><>

Weather

जम्मू शैहर ते एहदे आहले-दोआले दे इलाके च कल शामी आंगर गै अज्ज बड्डलै बी घनी धुंध कारण आम जनजीवन टकोहदा करियै गड्डियें दे चलने च दिक्कत आवा'रदी ऐ- जिसलै जे पूरे जम्मू प्रांतै च सुक्की ठंडू दा प्रकोप बरोबर जारी ऐ। धुंध दे चलदे किश फुट दे छिंडे पर दिक्खना मुश्कल होआ'रदा ऐ। उआं मौसम विभाग आसेया दिती गेदी जानकारी मताबक अज्ज शामी'लै किश थाहरें हलकी बरखा बरने दे बी आसार बने दे न- जेहदे नै लोकें गी सुक्की ठंडू ते धुंध थमां राहत थोने दी मेद कीती जा'रदी ऐ। इस बारे जानकारी देआ'रदे न मौसम विभाग दे इक अधिकारी

<><><><><><>